



四

錢竹汀詹事日記鈔讀路振九國志此書久不傳邵  
二雲於永樂大典中鈔得傳百三十六篇蔚有香夢  
常排次為卷十二其書稱荆南曰北楚王伯厚云九  
國志四十九卷其孫綸增入荆南高氏治平元年六  
月上之寶平國也陳振孫則云末二卷張唐英補撰  
合五十一卷



宋小茗廣文惜陰日記餘姚邵二雲編修於永樂大  
典中錄得傳若干篇編為十二卷先助教公曾向借  
鈔今檢各傳吳四十四南唐一吳越五前蜀十八後  
蜀廿七東漢五南漢八閩八黃思安附楚十九北楚  
一計傳百三十六篇其稱荆南曰北楚王伯厚謂其

孫綸增入陳振孫以末二卷為張唐英補撰助教公  
云曾見大典原書頗多殘闕此本已有為二雲編修  
所校補者雖不全之書吉光片羽彌足珍矣  
道光己丑嘉平月金澗李遇孫錄

九國志

卷一

吳

宋路振撰

袁襲

劉威

陶雅

李神福

臺濛

張訓

李遇

劉金

秦裴

馬珣

劉存

李簡

柴再用

陳璋

侯瓚

朱景

張崇

王綰

王稔

李厚

陳知新

朱虔祐

卷二

吳

劉信 馮宏鐸 賈鐸 危全諷

譚全播 李濤 鍾章 朱瑾

米志誠 翟虔 張可琮 鄭璠

揚彪 陳祐 劉權 崔太初

陳彥謙 高澧

卷三

吳

田頽 安仁義 朱延壽 徐溫

卷四

南唐

周本

卷五

吳越

杜建徽 鮑君福 成及 顧全武

黃晟

卷六

前蜀

王宗裕 王宗壽 王宗鑑 王宗佶

王宗翰 王宗滌 王宗侶 王宗瑤

王宗播 王宗鈇 王宗弼 王宗範

周博雅 晉暉 張造 張勅

李簡 潘在迎

卷七

後蜀

趙季良 趙庭隱 趙崇韜 張業

武漳 李肇 李仁罕 李延厚

張公鐸 張虔釗 潘仁嗣 龐福誠

李彥琦 孫欽 何重建 孫漢韶

高彥儔 李廷珪 王彥銖 李奉虔

王昭遠 安思謙 焦彥賓 趙進

石處溫 孟思恭 申貴

卷八

東漢

蔚進 張元徽 鄭進 衛儔

李隱

卷九

南漢

劉洪操 劉洪杲 蘇章 吳懷恩

陳道庠 邵廷珩 潘宗徽 郭崇岳

卷十

閩

黃仁諷 許文稹 王仁達 楊思恭

留從效 王忠順 董思安 陳洪進

卷十一

楚

張佶 許德勳 鄧進忠 姚彥章

秦彥暉 王環 王贊 李瓊

呂師周 廖光齊 彭玕 劉昌魯

鄧處訥 龐巨昭 彭師嵩 劉言

王逵 周行逢 何敬真

卷十二

北楚

李景威

九國志卷之一

吳

袁襲

宋路振撰

襲廬江人少好學善屬文淵明緯象秦畢之亂高駢  
辟行密為行軍司馬俾率所部赴難行密猶豫不行  
襲言於行密曰高駢倦於政事聽惑妖妄彥等雖以  
誅呂用之為名觀其事乃以暴易亂耳寧知非天將  
贊於公耶行密善其言乃移檄諸州誘集徒眾將兵  
數萬長驅至廣陵秦畢害駢襲勸行密縞素舉哀於  
城下眾皆義之及破賊入城招輯編戶會孫儒兵至

行密問計於襲曰今城壁未完賊且盛若儒至圍城是重擾民也不如且避之先是海陵將高霸擁衆來附行密將令以兵屯天長扼儒來路襲謂行密曰霸擁大衆心持兩端若使居天長是自扼也可因攜其士卒擒而斬之行密遂斬霸而併其兵行密聞孫儒至復欲遁歸海陵襲曰不若歸合肥繕甲兵再議攻取今稽諸乾象公必再來及孫儒逼城行密果自天長返謂襲曰無子吾幾不得歸行密平宣州獲趙鏗留與其弟同館鏗與梁祖有素果遣使來求鏗時襲寢疾行密使人問襲襲曰但斬首送之必無慮也未幾卒襲剛忍好克每欲殺人必折節下之行密哭之

曰吾每恤刑而襲好殺享年不永深可哀也

劉威

威廬州慎縣人少為小吏豪爽有志節與田頔陶雅俱為行密奔走之舊行密起淝上及平秦畢有功表領竇州刺史大順初與安仁義敗孫儒別將劉建鋒於武進其後儒兵益集威與頔屢為所敗行密將歸銅官威曰今衆寡勢殊殆難與爭然儒焚室掃壘絕後而來糧若不繼何從供饋公宜勿與戰堅壁以禦之坐待其弊行密然之儒果敗乾寧初表授廬州刺史及行密承制封拜就遷淮南節度副使行軍司馬東西行營副都統未幾加使相天祐三年授鎮南軍

節度使撫州危全諷率虔吉撫信之衆十餘萬將復  
 鍾傳舊地時州兵無多士庶大駭威獨傲然日縱酣  
 飲全諷屯象牙潭不敢輕進及周本破全諷四州初  
 平渭令威巡視四境撫諭而還先是行密疾病問周  
 隱以後事隱以威為請威初聞不能無意及移鎮鍾  
 陵復多專刑徐溫請討威威聞之沮喪計無所出有  
 幕客黃訥謂威曰公受謫雖深反本無狀能挺身入  
 覲必解前疑也威曰善遂遣訥為先容渭果復令之  
 鎮天祐十一年卒於鎮年五十八

陶雅

雅字國華合肥人本儒家子儀形魁偉眉目甚秀乾

符中天下將亂始投筆和門會西蕃入寇徵四方兵  
 防秋靈夏雅與行密肥上軍偕往未幾改隸諸葛爽  
 征沙陀有功從爽鎮河陽還補廬州衝山指揮使行  
 密據合肥遣雅平鄉盜秦定過修己等遷八營主將  
 光啓初破桐城吳迴擊李本於柳子山乘勝攻舒州  
 下之以雅為舒州刺史為蔡盜許勅潛兵夜至雅奔  
 歸文德初從行密破趙錕授池州刺史大順中破孫  
 儒軍於人頭山儒平授常州刺史遷池州團練使田  
 頽攻歙州時給事中裴樞守新安將歸款於行密以  
 宣州副使魯邵往代之是時諸將授郡鮮不以虜斂  
 為事惟雅寬厚人多便之樞因遣問政山人聶師道



往說顏曰苟得池陽陶牧為守州人孰不承命顏驛  
報行密因令雅治新安入見樞盡州郡禮樞奇之及  
樞至京師奏雅為歙州刺史天福三年田頔以宣州  
叛雅以州兵助臺濠伐之頔出戰橋陷墮馬為帳下  
小卒許渥王綬所殺宣州平兼西南面招討使先是  
順義軍使汪武聚盜據婺源行密以為滁州刺史婺  
源歙屬邑武恃險未嘗謁雅及頔叛武多行剽劫至  
是雅移檄聲言討洪饒由婺源往武引弟姪十餘人  
就路迎謁雅頔左右擒殺之綬營入其營中無敢動  
者天祐初陳詢以陸州歸款吳越遣萬眾攻詢雅率  
兵救之軍士夜驚多踰營遁去將吏白雅欠伸不應

乃下令曰明旦有軍士不在營者俱斬果遞相傳告  
未頃而定明年破婺州虜越州刺史沈夏以功遷衢  
睦團練使江南都招討會宣州王茂章叛奔越雅虜  
茂章伏兵斷其歸路乃令大將軍金師會領睦州事  
遂班師新安而越兵大至衢睦婺三州復沒八年移  
鎮武昌雅利黥川殷阜上書寢之遂遙領武昌軍節  
度加同平章事知歙州團練觀察等事十年八月卒  
於任年五十七雅性沈靜好讀書手不釋卷雖臨陣  
敵常褰衣博帶自幼年戲弄未嘗有錐刀傷手及為  
大將每矢石交飛終莫能中接賓佐有禮事兄弟以  
孝敬非公宴不舉音樂疎財重士人以此歸之典黥

川二十餘年民感其化生男女或以陶為字焉

### 李神福

神福洺州人幼執親喪哀毀過瘠鄉里異之及長沈厚勇敢唐末四境交募勁兵因隸上黨軍籍時高駢兼諸道行營都統神福從州將王重屯淮海因投于行密中和中同安賊陳儒攻刺史高瀆遣使來告行密未能救謀於神福對曰此群盜烏合易與耳公但聲言赴援可不勞尺及為公解之乃請本軍旌旗間道以入既夕引州兵出外各持旌旗入列大陣之狀儒果夜遁行密大奇之光啟二年壽州張翺叛寇泚上神福率兵與戰敗之于楮城秦畢之亂高駢召行

密因遣神福諭曲谿劉金盱貽賈令威各以義兵來附破秦畢軍神福功居多會選卒為黃頭軍遷神福為左右黃頭都尉龍紀中涇縣王賞太平嵇常滿俱聚盜剽鄉里神福引兵破之但誅其首惡餘皆不問大順二年孫儒前鋒兵屯漂水行密遣神福將兵禦之神福謂諸將曰兵倍不戰况儒衆十倍於我當且避其銳以驕之乃退舍而儒衆不怠神福乃選銳卒躋險夜襲之果大潰又擊儒要山寨破之擒其將李宏以功改左游奕將銅官鎮過使田頽為孫儒所敗行密欲退守銅官神福諫曰儒掃境而來利在速戰宜堅壁清野以老其師神福願以本軍據險結柵時

出輕騎抄其糧運彼前不得戰退無儲糧此送死之道行密曰善因以神福為宣池兩路都游奕使是夏儒食盡果敗以功奏授左千牛衛將軍景福二年廬州刺史蔡儔叛遣何瓌來寇神福迎擊於青斗山大破之遂傳城下賊平遷左衙都校未幾授舒州刺史天福元年與呂師造攻臨安錢鏐使顧全武來援神福退師令羸老行又令師造設伏青山路自將一軍殿後夜未半全武果盡銳來追神福偽北走伏軍發前返來攻越軍大敗擒全武復攻臨安久不克先是神福遣使護鏐先瑩禁其樵採及獲全武又遣通家問越人皆感之因納其犒賂而返二年改昇州刺史

行密以女妻其子承鼎三年攻杜洪於鄂州大敗洪軍時城中積荻山上神福謂將軍曰今夜焚此諸將皆不測是夕遣人乘舟載火炬至灑口分焚樹偽為梁軍來援之狀城中焚荻應之諸將伏其智梁祖遣將韓勅率步騎萬餘屯灑口又令荆南以舟師赴援成汭盡眾浮江而下神福登岸望之曰舟人雖盛然首尾懸絕宜急擊之乃迎戰大別山汭果敗溺水死勅亦引眾遁去自是洪勢益孤會宣州田頔叛襲昇州劫神福與帳下妻子俱歸宛陵厚養之以誘神福行密急書召神福覽書袖之揚言曰鄂州尚未下又令急取荆南因號令諸軍速闔順流而下頔遣將王

九國志卷一  
鈔本  
壇汪建以舟師援洪又別遣人遺神福書約分地而治神福斬其使擊壇建破之復戰于皖口又敗其衆浮尸棄舟蔽江而下壇建以輕舟遁去四年以兵屯田梁加西面行營招討使光州團練使疾甚求醫於江都卒年五十

臺濛

濛字項雲廬州合肥人少為金牛鎮將行密據合肥始來歸從征秦畢趙鏗俱破敵有功大順中馬敬言為孫儒敗於廣德初儒與李從立乘勝至東谿時城守未固軍士大恐濛以一旅巡谿西會天晦詐令士卒傳諭往返者數四謂大衆屯集中夜皆遁去及儒

柵陵陽濛於魯江五堰作輕舟饋糧終儒之世軍無饑色從行密歸廣陵以功遷楚州刺史乾寧三年破蘇州以濛守之越人水陸大至濛擊敗之錢鏐親率舟師至會糧盡濛拔衆遁歸光化二年行密初得朐山以濛為海州刺史在任貪殘為郡民所訐又為田頔所譖降為漣水制置使天復三年田頔叛于宣州行密歷數諸將無敵頔者乃謂濛曰非公莫可濛曰頔不守富貴自取滅亡濛今仗大王威武以順翦逆往必擒頔願王無慮行密大悅濛初入其境即翻陣以往軍士俱笑其怯濛曰頔宿將多謀當自過防禦日果遇陣於廣德濛欲奪其銳先以行密書遺頔將

校皆下馬拜受因其擾亂濛麾衆擊之顏兵大敗乘  
勝遂圍宣城冬十月顏出州外求戰登橋馬墜為外  
軍所殺宣州平行密承制加濛檢校太保宣州觀察  
使天祐元年卒於治所年五十

張訓

訓字克明滁州清流人身長八尺餘要帶十圍中和  
三年歸行密於合肥行密訪以方畧悅之令從石令  
言攻同川克其城從田顏擊張翱於褚城入擊趙鏗  
昌山兵破之克宣州訓功居多遷左右黃頭指揮使  
以所部戍廣德拒孫儒於黃池從李神福襲歷陽下  
滁州孫儒焚廣陵悉銳攻宣州行密命訓潛軍入廣

陵滅其餘燎獲軍儲數十萬以賑饑民行密令馬奭  
守廣陵奭叛為諸將所殺城中大囂訓整師以出衆  
乃定孫儒之起也毗陵守將劉建峰從儒俱西土豪  
陳可兒據毗陵訓率兵奄至城下可兒倉卒出迎訓  
於馬上手及殺之奪其兵入城中又率兵絕儒糧道  
於安吉馬頭儒敗訓論功為最景福元年從行密歸  
江都路經毗陵行密顧左右曰毗陵大城也訓一劍  
下之不亦壯哉即授温州刺史乾寧二年屯兵漣  
水以備梁師劉知俊聚糧石碭戍守皆潰盡焚其儲  
積訓歸路出東海為知俊所邀訓擊大破之青口之  
後吳師悉起訓師所部迎行密行密喜以兵千人令

為前鋒會朱瑾假梁人兵鋒先入其壘訓登岸疾戰  
踰柵而入遂破龐從自軍以功授淮海遊奕使天復  
三年王茂章平密州以訓為刺史會梁祖以大軍至  
訓謂諸將曰城孤師少何以待之皆欲焚城掠聚而  
去訓曰不可如此則我師難歸遂封府藏下懸門立  
虛幟於城上遣老弱居前訓自以銳兵殿其後梁軍  
前鋒至見城上旗多未敢逼數日方入城又見府庫  
城邑晏然如故亦不追之天祐七年遷黃州刺史卒  
於治所訓質直勇而多力曾渡毗陵西橋馬畏不渡  
乃持尾鬣舉之以濟然不恃其勇故多功保全焉

李遇

遇合肥人始事行密帳下光啟中禦梁軍於慎縣遇  
單騎按槊率先破敵以伍長遷馬軍副指揮使從平  
秦畢趙鏗孫儒皆有功遷淮南馬步諸軍都尉累遷  
常州刺史天復三年安仁義以潤州叛夜襲毗陵仁  
義善射諸軍多畏避遇背城逆戰仁義喪師自是不  
敢東顧天祐中宣州王茂章奔越乃以遇為淮南行  
軍司馬宣州團練使徐溫專政遇不能下之常言曰  
徐溫何人吾所未識溫怒命柴再用將兵送王壇代  
遇不受命再用攻其城逾月不克時新王遣典客何  
堯說遇曰公本圖反請斬堯以狗本無反心可隨納  
款遇聞王命遂開門委命溫族之孫仁義方嬰為入

九國志卷一  
抄本  
匿之而免李昇秉政以仁義為縣令

### 劉金

金淮陰洪澤人光啟中江淮兵亂從鄉首李章保曲谿章死金代有其衆行密營廣陵金盡以其衆來附破秦彥金有力焉文德初從攻趙鏗於陵陽明年金度鏗必遁思以計擒之因偽與鏗通好約為外應鏗大以金帛為遺復夜迎金入卧內許妻以女金歸營慮鏗兵盛出不能制乃遣人臨城大譟云劉郎不能與爾為女婿也鏗聞之沮喪果宵遁大順中孫儒寇宛陵行密遣金拒之屢破儒軍以功授滁州刺史行密破鍾離移濠州刺史未幾遷團練使天祐二年卒

子仁規嗣仁規娶行密女渥襲位遷過口兩城使乾貞初授清淮軍節度使

### 秦裴

裴慎縣人少驍勇頗涉獵以鷹隼為事嘗云天上黃鷹地下黃金餘不足貴也行密起合淝因隸帳下大順元年奏授檢校左散騎常侍行密據廣陵以裴知揚子縣有虎入縣郭裴親殺以獻行密召褒賞之裴曰此衆共殺非獨能制也行密歎曰勇而能謙必享富貴歷高郵無錫令俱有能名乾寧五年率兵破越崑山鎮以千兵守之錢鏐遣顧全武引萬衆來復裴援絕全武以檄說裴裴封函納款全武頗自負召諸

將聚觀全武曾為僧發函乃佛經一卷全武大慚裴戰無虛日士卒多病傷死未幾糧盡告降錢鏐預設千人食以待之及出士卒不滿百鏐讓之曰軍孤眾寡何苦相拒裴曰但事君盡節死而後已今食盡歸命非本志也鏐大賞之因熟視裴曰君有藩侯相他日必歸君餘勿為念裴在越三年寂無歸耗忽一日裴遣人告行密遣李神福攻越臨安鏐遣顧全武方宇救之為神福所擒明年行密送全武及宇易裴以歸天復三年從李神福攻鄂州荆南成汭乘大艦來援裴率兵沂流逆戰汭敗溺水死又攻田頔眾於吉陽磯以功授諸軍都尉從劉存攻夏口破之加昇州

刺史天祐三年洪州鍾傳卒州人立其子匡時江州刺史延規傳之養子忿不得立以其郡納款因授裴西南面行營招討使攻匡時至蓼州時軍欲限水為柵裴不聽匡時果遣將劉楚據之諸將相顧失色俱咎裴裴曰城中驍銳惟楚耳若令總眾拒守此城何由卒破吾固留此要害以謀致之既而分軍晨出盡銳破柵既擒楚方傳於城下未幾城陷擒匡時以獻諸將皆服其智號令嚴肅兵士無敢殺戮洪之士卒俱來就營求其戚屬為出府帛贖還之洪人感悅授洪州制置使張顥用事慮裴為變急召歸及湖口遇鄂帥劉存與潭軍戰沒復授裴鄂岳觀察使會重午



裴宴諸將而潭人入寇裴遣弟師鐸師虬乘戰艦先往裴食訖登黃鶴樓以望乃以平頭舫顧小校曰但乘此卷旗奪潭人船以戰及與師鐸軍合乃建大將旗潭人睞貽裴因擊敗之六年入覲因求歸故里以民禮謁縣宰見里中故老必拜坐以少長為齒九年加武昌軍節度使遇疾求歸至湓中卒年五十九裴在治七年積軍儲二十萬開青山大冶公家仰足

馬珣

珣廬江人少翹勇有機畧初以貨財商于江都會秦畢圍城乃歸鎔鄒軍畢師鐸於城南立高樓以望城中呂用之患焉募壯士摧其樓珣應募夜半獨仗劍

入賊營倒之用之厚賞遷十餘級行密入城聞其名錄為偏將與朱延壽相友善乾寧初授珣舒州刺史移守漣水三年梁將朱友恭圍瞿章於黃州命珣率兵援之黃州陷戰不利與張訓呂師造成知進石率等收散兵三百人自黃州間道緣分寧絕山谷而東道經撫州危全諷聞其來布四壘于路壘皆萬餘人珣語諸將曰彼謂我可坐縛也今與諸軍擊其中堅逐其軍帥取其資而食其穀可以歸矣會夜擊全諷之壘大破之全諷僅免乃飲宴于賊營擇其利兵而用之明日廣張旗幟揚麾伐鼓從山直下衝其連營鋒若雷電賊皆潰走珣凱唱而歸謁行密言其戰狀

行密罵之曰懦堅子何不遂據其城珣拜謝不敏珣滑稽好妓樂歌舞雖出師登騎俳諧不輟既而卧疾謂所親曰若患愈當乞師數千可以蕩平西南夷獠俄而卒衆惜其智勇部下將校見其二子無不感慨申敬朱延壽錄其孤而字之延壽敗行密收其二子給與第宅

劉存

存陳州人少拳勇從行密起合肥破秦畢趙鏗皆有功孫儒入寇身先苦戰為賊斷足三指而戰不輟翌日行密出城與儒戰存請先登行密諭以指痛不止因求皮履裹足而往是日平儒以功遷壽州馬軍都

尉乾寧中預破葛從周於泚河遷舒州刺史改團練使天復中副李神福攻杜洪於江夏會田頔叛遣將汪建王壇率舟師沂流而上存與神福下瀝池磯逆戰為流矢中目存戰自若建敗存殺獲居多四年復攻江夏時神福病歸存代為招討使引十數騎巡城憇於高崗張樂命飲酒酣鄂兵大至存以旗向江三招而止鄂人望之仡然有頃自退軍中服其膽略存急熱鄂城樓梁援兵將突圍而出諸將欲急擊之存曰擊之賊必復入復入則城愈固矣不若聽其遁去諸將皆曰善是日城陷擒杜洪父子斬於廣陵市以功授淮南行軍司馬鄂岳都團練使天祐三年率舟

師攻潭州大雨不止軍回至瀏陽為潭人所敗執存  
以歸馬殷親解其縛欲授以官存大詬曰汝昔歲宣  
城潰散偶漏我鋒及今反欲臣我耶殷知不可留乃  
斬之唐保大中邊錡平湖南遣使就墳致祭贈宣武  
軍節度使武衛上將軍

李簡

簡上蔡人有膽勇資質瓌偉始隸陳蔡軍中趙錕選  
武幹之士因任為帳下親信龍紀初錕為行密所圍  
糧盡將逸簡給守門者得出因奔行密補黑雲隊長  
大順二年孫儒寇廣德行密將逆戰會夜屯於行密柵  
及旦儒軍圍之數重率百餘人挺身突戰自外破

柵拔行密以出遷黑雲都指揮使乾寧二年從攻濠  
州濠水深闊簡手搴重甲口銜大刀先渡踰壘破其  
關鍵擒刺史張遂以獻從攻壽州加淮南右廂馬步  
軍都虞侯先是江都多盜令錐嚴莫能禁止及是為  
簡獲者必徇其部分姓名所盜之物盡黥於面於是  
寇竊皆息三年從田頔破蘇州虜刺史成及從行密  
破龐從古於青口敗梁軍於潁河副王茂章援青社  
從臺濛圍田頔於宣州皆有功簡本姓陳既貴欲復  
其氏行密謂之曰天下皆知有李簡何處有陳簡也  
以是不易渥襲位王茂章將以宛陵叛命簡率眾攻  
之茂章聞簡至率眾奔越改楚州團練使杭人屢寇

無錫以簡為常州刺史改鄂岳觀察使天祐十二年授武昌軍節度使武義初加鎮西大將軍襲復州破之俘知州鮑唐以獻乾貞二年加西南面招討使入覲卒於采石江年六十九簡鎮上游之地十餘年重關洞啟敵人不敢侵軼然忍而好殺又非法重斂鄂民之高貨者無不破產時論以此鄙之

### 柴再用

再用蔡州汝南人性至孝七歲遇龐勛亂舉族避地祖訓盡不能去唯再用獨留侍賊見而去之以是大為鄉里所異及長沈毅有斷面黑如鐵人號為柴黑子會秦宗權召募驍勇再用以騎射應選時軍令亡

馬者斬一日戰回籍韁而寢既寤而馬逸再用追之遇賊于林中環樹而射一發人樹俱貫賊畏走遂奪馬而歸光啟中從孫儒攻廣陵再用本名存嘗與軍中小校結為死友會有告小校謀反儒斬之執再用至儒問何故反再用不對既伏質又問之始對曰某與彼相結為死友則某反矣公既誅之復何問焉儒竒之曰汝果不反吾再用汝因令改名再用儒敗歸行密授先鋒馬軍指揮使乾寧中朱延壽辟為衙將因遷壽團練都押衙敗梁兵于壽春遷團練副使從延壽平劉存于弋陽授知光州軍州事一日大震電家人皆伏匿再用當戶坐不動俄見青襦袴者四人

昇再用所坐牀出庭中復大震屋楹折有龍出焉梁  
兵寇光山再用擊走之以功遷光州刺史天祐二年  
梁祖平趙匡凝于襄漢乘勝畧淮上遣使謂再用曰  
苟以城降遷爾蔡州本郡為賞再用乘闥而拜曰此  
州城小衆寡王若先下壽州田當自送款梁祖信之  
攻壽州不拔而返再用襲之斬首二千餘級以功加  
檢校太保渥襲位遷楚州刺史俄授淮南左廂步軍  
都指揮使越人寇東洲遣再用率兵禦之賜長稍伍  
拾戰敗艦破水滿再用為長稍所泛得不溺家人聞  
敗飯千僧為禱再用戰歸取其飯召麾下以犒之曰  
此輩濟我佛何力之有十一年袁州劉崇景叛引潭  
將許真為援令再用攻之近城有萬勝岡再用欲奪  
之每旦出師岡下不與戰袁人頗怠一日列大陣岡  
南崇景望之氣奪因出戰再用躍馬徑入陣中斬首  
數十袁人大敗崇景棄城而遁武義元年破越軍於  
無錫遷鎮西將軍領天平軍節度使未幾移鎮武昌  
改得勝軍節度加中書令卒年七十二再用寬厚淹  
雅有儒者之風好讀左氏春秋未嘗省視厨廐寮屬  
白事有不如意但對之假寢諸子娶聘必擇平昔舊  
族史官王振請述戰功以補方冊再用曰鷹犬之效  
出自偶然何足紀也累歷藩鎮敦尚儉素車馬導從  
不過十人亦一時之良將也

陳璋

璋潁川人少橫壯不羈歷事諸帥俱無成乃歸行密未幾復委質於錢鏐景福初授杭州武勇都指揮使改鎮海軍踏白使乾寧中領賓州刺史從平董昌詔賜佐忠去偽功臣天復二年鏐將許再用叛據外城召田頔為援頔將樹柵於杭州咽喉之地鏐乘閨觀之大懼出金綵十舉募諸將有能奪其地者與之仍以頔為賞璋應募選驍健三百假護軍白馬以出免胄馳擊往返者數四竟奪之鏐大喜飲之巨觥即授璋衢州刺史與軍校葉讓不協因斬之與睦州陳詢連衡復歸款于行密鏐以兵圍其州踰月不能出行

密遣周本援之拔璋盡室以歸天祐二年行密遣陶雅平婺睦復授璋衢婺州諸軍事充都招討副使會王茂章叛雅棄其地改璋池州團練使署淮南節度副使越將張二保陷東洲授璋水陸行營都招討使擊仁保於海曲奪戰船三百艘盡復東洲舊地復乘輕舟入松江九谿偵邏越師大集團之數重璋獨射施工心目皆應絃而倒因奮銳衝擊長圍遂解軍回泊洞庭見橘林意欲除之謂士卒曰若食鱸用此木研酸酪不假他物自有香辛味諸軍皆爭取樹立盡九年以舟師破岳州擒刺史苑玫荆人潭人會於江口邀璋歸路璋乃方舟並貫夜過其所敵人後出已

陳璋

璋潁川人少橫壯不羈歷事諸帥俱無成乃歸行密未幾復委質於錢鏐景福初授杭州武勇都指揮使改鎮海軍踏白使乾寧中領賓州刺史從平董昌詔賜佐忠去偽功臣天復二年鏐將許再用叛據外城召田頔為援頔將樹柵於杭州咽喉之地鏐乘閨觀之大懼出金綵十舉募諸將有能奪其地者與之仍以頔為賞璋應募選驍健三百假護軍白馬以出免胄馳擊往返者數四竟奪之鏐大喜飲之巨觥即授璋衢州刺史與軍校葉讓不協因斬之與睦州陳詢連衡復歸款于行密鏐以兵圍其州踰月不能出行

密遣周本援之拔璋盡室以歸天祐二年行密遣陶雅平婺睦復授璋衢婺州諸軍事充都招討副使會王茂章叛雅棄其地璋池州團練使署淮南節度副使越將張二保陷東洲授璋水陸行營都招討使擊仁保於海曲奪戰船三百艘盡復東洲舊地復乘輕舟入松江九谿偵邏越師大集團之數重璋獨射施工心目皆應絃而倒因奮銳衝擊長圍遂解軍回泊洞庭見檣林意欲除之謂士卒曰若食鱸用此木研酸酪不假他物自有香辛味諸軍皆爭取樹立盡九年以舟師破岳州擒刺史苑玫荆人潭人會於江口邀璋歸路璋乃方舟並貫夜過其所敵人後出已

無及矣璋每入敵境或晚泊戒士卒整舟楫待令下當行必此宿軍之所也若移帳下岸修棚習射及夜多前去越兵寇上饒璋引兵侵蘇湖上饒之兵乃解乾貞元年加鎮北大將軍領平盧軍節度使溥遣王彥璋苗濬舉兵西伐璋謂嚴可求曰朝廷攻湖湘何不用璋與周本彥章與濬可當其偏裨耳其後彥章果敗三年加使相大和二年改鎮東將軍充寧國軍節度使遇疾歸江都求醫至江陽縣卒年六十五

侯瓚

瓚字信美城濮人黃巢聚兵於曹濮瓚從之時年十六巢陷京師瓚逃歸鄆州時僖宗幸蜀徵十道兵討巢朱瑄以鄆兵應命瓚為偏將預行尋復與諸道兵伐秦宗權皆以勇果聞頃之隨瑄弟瑾襲兗州瓚與瑾逆殺齊克讓破宿州瑾據有兗州瓚為爪牙梁祖攻兗州力戰以却梁兵梁祖圍時溥于徐州兗鄆兵救之不利溥死梁兵遂攻兗鄆戰于城下者數年長圍三合而三却之時瓚常在瑾之左右大小數百戰隨瑾搏擊馳突出入敵中殺傷不可勝計乾寧四年隨瑾與太原將史儼掠徐泗瑾將康懷貞以兗州叛瑾無所歸與瓚等率兵數千走海州遂來歸行密授瓚衙將是歲梁祖大舉兵伐吳龐從古聶金率衆入自青口葛從周以精甲圍壽陽江淮大恐行密以兵



萬二千會戰于青口時兵起倉卒加以陰寒戰士皆  
攘食飲雪而行甫及梁營則豎戈植足鬪志未決瑾  
與瓚率五十餘騎潛濟淮入自壘北舞槩而馳雷聲  
雷沸梁兵皆殞眩不能舉遂斬龐從古大將繼之死  
者大半鳴鼓西行破葛從周于壽陽沈其卒萬餘人  
於泮河梁人大震瓚功為多授左右隨從騎軍副使  
隨茂章救王師範於青州破梁兵五萬餘殺友寧  
瓚復有功從周本攻蘇州戰于黃天蕩從徐溫却王  
景仁於壽陽逐劉崇於袁州朱瑾救徐州之圍及攻  
潁州瓚皆預戰累授滁州刺史大和三年卒年七十

朱景

景壽陽霍邱人少豪猾驍壯有膽畧為邑中所服行  
密得淮南以霍邱地界南北盜賊交會難可防限聞  
景之勇為遠近所畏故以委之且伺北鄙之奔突景  
招合無賴年少得絕伎者百餘人撫禦之晝與捕獵  
暮分巡警月餘而材伎強力無有及景者以是服從  
如一沿淮群盜莫敢犯之梁祖聞其名命寇彥卿率  
勁騎三千襲霍邱圍取景且諭梁祖之意令降景率  
其徒戰于邱墟林澤中射死者無數彥卿兵折力殫  
而去康懷貞之至復為景所困王茂章來寇度淮水  
可涉處立表識之景陽置于深潭水中立表浮木之  
上茂章軍敗望表而涉溺死者大半積其尸為京觀

後破李進金何駟涉騎數千尋拜滁州刺史移光州  
刺史卒於任

張崇

崇廬州慎縣人少以伉勇隸軍籍光啟中始補戎職  
從行密破趙鏗有功乾寧二年行密攻蘇州崇為越  
人所獲行密欲嫁其妻妻曰崇忠孝必不負公請待  
之未幾崇果返以為諸將都尉遷蘇州防遏使越人  
攻蘇州崇從臺濛敗越兵於小白方天復中安仁義  
叛崇與茂章率兵攻之擒仁義以功授常州刺史累  
遷廬州團練觀察處置等使天祐十一年加檢校太  
傅光州軍校王言叛崇討平之授平南軍節度使武

義元年加安西大將軍梁祖遣將合湖南兵攻荊州  
以崇為應援招討使引軍攻安州降其騎兵二百而  
還遷得勝軍節度使加中書令大和中封清河郡王  
卒於治所年七十二崇殘酷暴斂肥人畏之嘗入覲  
議者盛言不返鄜市少年皆捋頤相慶崇歸聞之因  
斂捋頤錢數萬貫尤好使酒殺人重掌奏刁鎔每謂  
左右曰吾醉慎勿令鎔出一日醉甚三召鎔至竟殺  
之詰旦召鎔左右曰已殺矣崇大悔取其首視之揖  
曰罪過員外其輕人命如此頗信鬼神家人求以厭  
息崇者先是后土廟塑韋安道配座乃遣巫女詐云  
天上謫后土與公為偶崇往視之巫女潛洩異香以

為后土至矣宗乃命樂對像酣飲一夕家人竊其兵器盡寘廟中巫女報曰列仙不喜殺戰故遣六丁取至公不得更用此傷害宗因是大為改悔歷藩鎮二十年掠下以奉上每歲一入覲輸貢絡繹國中執事無不受賂故其肆虐凌下保全祿位終身為橫耳

王綰

綰廬江人勇敢有謀光啟中始從行密破趙鏗下蘇濠累有戰功署行營諸軍都尉兼漣水防遏使光化三年青州戍將陳漢賓殺海州刺史牛從義歸款於行密行密命綰與張訓率勇士二千乘勢未附襲之漢賓設備不暇果出迎謁遂入府中諭以利害漢賓

乃解甲聽命以功授檢校左僕射是歲青州王師範告沂密內叛授綰海州副使兼沂密兗鄆諸州副使與臺濛攻密州下之將擊沂州覘者曰城中偃旗卧鼓寂若無人綰曰此必有備而援兵近矣諸將曰密城既下沂易與耳綰不能禁但於茂林設伏以待果攻沂不克援兵具至師既退為沂兵持其後綰伏兵擊之沂人大北未幾代臺濛為海州刺史天復三年改漣州制置使天祐中復刺海州就加平盧軍節度使明年改定南大將軍知處州防禦使谿洞民多為盜至皆平之順義元年授百勝軍節度使召歸乾貞初卒年七十二

王稔

稔廬州人少驍勇始以騎射隸行密帳下累從征討有功乾寧中梁祖遣將葛從周討揚州稔與柴再用率兵禦之稔以六騎登高山覘梁軍為梁軍所圍候者望見之請以救兵往再用曰王稔辦事不須憂也稔與其徒解鞍而卧梁兵不敢上會暮圍兵漸合稔乃步依林木轉戰而行因是解去時亡馬令峻遂重襲梁兵奪馬而還軍中壯之袁州劉崇景叛湖南將許貞率衆來援貞單騎求鬪稔獨援長槊逐走之袁州平以功授滁州刺史又從徐溫破寇於山南遷壽州圍練使未幾授清淮軍節度稔好儒學性寬厚褒

衣博帶有同儒者先是壽春人多尚武復警夜至嚴稔至唯閱經籍下帷肄業通宵無禁不數戰鼓篋待問者四境鱗萃每講肆開必饋以束修旨酒鄉里薦舉歲常百餘人稔多力每選二勁弓弦加兩耳分手前引雙滿者數四乾貞三年歸授左右雄武統軍卒年六十六

李厚

厚蔡州人乾寧初歸行密為黑雲隊長破濠壽有功加檢校兵部尚書改隸朱延壽將戰會立新軍每旗以五伍為制遣原以十旗擊其西偏不克而返延壽將斬之原曰彼衆我寡願更益師以往苟不勝敵死

未晚也乃增以五旗原力戰梁人亂延壽乘之遂大敗行密聞之召歸授黑雲都指揮使天復中從臺濠破宣州天祐三年以兵授宜春深掠越境師還以功遷黃州刺史溥襲位授秦寧軍節度使同中書門下平章事卒於金陵年六十

### 陳知新

知新廬江人從行密起兵攻畢師鐸孫儒皆有功屢以親軍攻定南北諸部多立奇績累授先鋒指揮使天祐元年率兵攻邑陵破其水柵逐楚將許貞盡收其地拜岳州刺史三年加團練使是歲從劉存大舉師伐湖南會天大雨旋至瀏陽江為楚兵所襲存與知新戰敗俱被擒楚王馬殷親釋其縛且慰勉之冀為已用知新叱罵曰吾豈能負楊公而反事汝耶殷知不可留乃殺之家悉陷敵

### 朱虔祐

虔祐潁川人少多力善戰初為義興令行密惜其材召居帳下常率衆居前從王茂章援青州去為軍鋒歸則殿後我軍背嶮虔祐以五百人當之追兵大至茂章亦留解鞍而寢虔祐促茂章亟去自與梁人戰殺傷無數日暮兵盡被擒士卒無求生者以故我軍行遠追兵不能及梁人執虔祐見太祖太祖壯其事欲釋之虔祐請死不得瞋目大罵被害行密厚恤

九國志卷一  
其家後數年嫁其妻詰旦行矣其妻沐浴禱之曰王  
愍我窮獨恐終不能自存當嫁我于某氏嗟乎今日  
猶君之妻明日他適矣君忠烈若是歿豈無神遂棄  
我是夜無疾而卒夫忠婦義如此

九國志卷之一終



九國志卷一  
心源精遠  
藏南學